

Segun Anky Vrolijk, directora di MFA:

Ta papiando cu hoben y grandi nan, fundacion y grupo den bario pa percursa cu cada MFA ta operacional for di momento cu nan habri

ORANJESTAD - Trahando di manera anticipa y pro activo, personal di Facilidatnan Multifuncional (MFA) tin tempo caba trahando, no for di un lessenaar, pero den seno di cada bario. Asina a keda manifesta pa medio di hefe di e departamento, Sra. Anky Vrolijk. "Gobierno tabata kier bon informacion prome cu yega na un proyecto asina, paso ta un proyecto hopi grandi y mester di hopi material y informacion". Pa tal motibo ekiponan nombra a drenta cada bario pa haci inventarisacion y crea un perfil. "A sinta cu grupo di hendenan pa haya sa mas kico ta e necesidad real di e bario", Vrolijk a expresa diaranson siman pasa durante firmamento di acuerdo di construccion pa MFA Noord, un momento importante. Durante ultimo dos aña, colega Omar Harms y Harm van Sjeip a haci encuesta, pero tambe Prome Minister Mike Eman a sa di bay den



e bario y haci anochinan informativo. Esakinan a sirbi pa trece e bario hunto pero tambe pa wak e diseño di e edificio y con pa e funciona na su eficiencia maximo basa riba e necesidad y deseonan di e bario. "Por ehempel bo kier un edificio cu ta pas cu e cultura di e bario y bo no ta bay traha algo segun bo gusto, pero segun e gusto di e bario. P'esey a scoge pa cada MFA tin un arkitekto di e mesun bario pa e keda cu e identidad di e bario", Sra. Anky Vrolijk a splica. Intencion na prome instante tabata

pa reuni den grupo chikito, pero na final a bira gruponan grandi. E hefe di MFA a bisa cu a topa den cada bario cu un cantidad grandi di grupo, fundacion y boluntarionan. "A enfoca hopi tambe riba hoben y a bay scolnan busca informacion, ideanan mas moderno, paso e edificionan aki mester ta moderno. E vision di Gabinete Mike Eman ta cu e edificionan aki mester tin un concepto moderno cu lo keda valido den futuro pa su bon funcionamiento den comunidad". Cada Facilidat Multifuncional na Noord,

Paradera, Santa Cruz, Savaneta y San Nicolas tin un gerente y un asistent nombra. Atrobe a percursa pa esaki ta personanan cu ta bin di e mesun bario y conoce bon pa nan por ta mas util posibel. Den e caso di Noord, gerente ta Sr. Richard Tromp, kende manera Vrolijk a indica ta un persona hopi capacita. "E lo guia e MFA y ta e persona di contacto pa tur fundacion, pa tur e clubnan, pero tambe pa e habitantenan di e bario mes". E Facilidat Multifuncional ta un concepto cu Gobierno di Aruba ta introduci pa re-

emplasa e modelo anticua di Oficina di gobierno auxilia. Ademas di e servicionan actual cu ta obtenibel manera pago di cuentanan di utilidad y documentonan di Censo y Belasting, e MFA moderno lo amplia e posibilidad na otro instancia y departamentonan. Manera Sra. Vrolijk a splica "Un ehempel ta AZV cu tabatin un necesidad pa bay den e bario di Noord mirando cu nan central ta na Playa. Nan kier duna e servicio mas facil pa e persona bin na su AZV card. Bo por imagina cu si bo no tin un AZV, e problema si algo pasa. Di e manera aki bo ta yega mas facil y percursa cu esaki ta na ordo". Mescos ta e caso cu FCCA y DIMAS, entre otro. Tambe lo tin espacio aparta pa Biblioteca, sala pa les di obra di man y musica y podium pa tur den bario cu kier presenta. Den e modelo nobo, e MFA lo ta habri oranan normal di oficina, pero lo keda habri tambe te anochi pa ricibi habitantenan di e bario. □